

**Augustin Bass - Cavegn,
Rueras/Clavadi
27-02-1914 - 28-01-1997**



El sesa buca pli alla meisa-canorta en l'ustria dil hotel La Val a Rueras e gauda ruasseivlamein siu caffè ni legia las gassetas da mintga di ni discuora cun hospes sur dil curriu e passau en vitg, en la val ni leuo el mund. Era pos ti buca pli entupar el, pusaus sin sias duas crutschas vegnent giu dallas Crestas Flurin ni sin via encunter la baselgia da s.Giachen. La damaun dils 28 da schaner 1997 annunzia il zenn da mort ch'Augustin hagi bandunau nus quietamein duront la notg vargada.

Augustin Bass ei naschius ils 27 da fevrer 1914 a Clavadi sco emprem affon dils geniturs Maria e Gion Benedetg Bass-Levy. E1 sulegliv uclaun da Clavadi ha el passentau l'affonza en compagnia da tschun frars ed ina sora. Fini ils onns da scola a Sumvitg anflein nus il giuven mat sco gidonter en in hotel a

Lugano. Sco usitau da gliez temps mava la mediocre paga meins per meins tier ils ses a casa. In di denton ha la patruna manegiau ch'ins duessi tuttina schar in per raps a quei giuven, pertgei las caultschas ch'el porti cuvierien strusch pli las schanuglias. In per onns pli tard entupein nus Augustin sco camerier en in dils pli renomai hotels dil marcau da Turitg.

Augustin haveva strusch varghentau 25 onns che la secunda uiara mundiala ei rutta o. Cun quei ei la lavur en ils hotels stada finida. Ei suondan plirs onns da survetsch militar e da lavur en tunnels si l'Alpsu ed en Stussavgia. Gl'onn 1943 cala Augustin cun la malauna lavur en tunnels e sepladescha tier la fabrica a Domat. 1944 marida el la giuvna Maria Cavegn da Rueras. Els secaseschan a Domat e pli tard cumpra Augustin ensem cun siu frar Flurin in'atgna casa. Era bratta el la lavur da fabrica cun lavur regulara tier ina scrinaria. En lètg procuravan gia tschun affons per lavur e quitaus. Cul temps secasescha Augustin cun sia famiglia a Rueras e daventa ustier e hotelier dalla Pensiun Badus.

Suenter diesch onns vegn la pensiun engrondida ed in iral da heighels aschuntaus. Gl'atun 1980 surdattan Augustin e Maria il menaschi alla feglia Marlis. Ei suondan in per bials onns da pensiun, ina ruasseivla sera dalla veta. Gl'october 1994 astgan els aunc festivar las nozzas d'aur.

Ina caussa sto aunc vegnir menziunda. Augustin ei staus, e quei schi ditg sco el ha saviu e pudiu, in passiunau catschadur. Strusch la patenta en sac ha el gia gl'emprem di sittau tut persuls ina tscharva ed ord tema ch'ella seigi buca lubida gl'emprem zuppau quella. Ils 30 da schaner 1997 ha in numerus pievel accumpignau il defunct sin siu davos viadi el santeri da s.Vigeli a Sedrun. Il Segner detti ad el la pasch meritada.

Placi Cavegn